

**1273-1273- OFP - Acta Capitulum Generalium Florentie Celebrati**

In nomine patris et filii et spiritus sancti. Amen.

Acta capituli generalis apud Pest celebrati  
anno Domini · M° · CC° · LXXIII° ·

Confirmamus has constitutiones. In capitulo de visitatoribus. ubi dicitur. capitulo generali studeant denunciare. deleatur. et dicatur sic. magistro et diffinitoribus generalis capituli studeant denunciare. vel priori provinciali. et diffinitoribus capituli provincialis. si ibi generale capitulum non fuerit celebrandum. Et hec habet tria capitula.

Item hanc. In capitulo De itinerantibus. in fine addatur. si quis frater ordinis nostri per se. vel per alium. ordinationem de se. vel de alio fratre factam. vel obedienciam sibi. vel alteri fratri iniunctam. per quamcunque personam extra obedienciam nostri ordinis constitutam. quocumque modo procuraverit revocari. vel in aliqua provincia. seu conventu. aut eciam officio. sive in studio generali poni. vel remanere. vel inde amoveri. vel cum personis extraneis commorari; ipso facto ex vi presentis statuti. omni voce tam in accusationibus aliorum et tractatibus eorum que ad capitulum provinciale mittenda sunt; penitus sit privatus. nec ad predicta restitui valeat nisi per magistrum ordinis; vel diffinitores capituli generalis. Et hec habet tria capitula.

Item hanc. In capitulo de capitulo cotidiano. ubi dicitur. similiter quisque caveat. ne malum quod audivit. etc. deleatur totum usque ibi. auditis vero culpis. Et hec habet tria capitula. Iste sunt approbaciones.

Approbamus has. In capitulo de electione magistri. ubi dicitur. mortuo igitur magistro. etc. totum quod sequitur. usque ibi. provinciales igitur priores. etc. deleatur et dicatur sic. mortuo igitur magistro vel a magisterio amoto. prior provincialis illius provincie. ubi sequens capitulum fuerit celebrandum. vices magistri optineat. quousque magister ordinis sit electus. exceptis absolucionibus priorum provincialium. et conventualium aliarum provinciarum et translacionibus fratrum de una provincia ad aliam. de quibus se nullatenus intromittat. nisi forte si aliquis frater non prior provincialis existens; pro provincialatus officio peteretur. Si autem illa provincia tunc priorem provinciam non habuerit; vel infra tempus sue vicarie eum mori. vel amoveri contigerit; prior provincialis illius provincie. ubi immediate precedens generale capitulum fuerit celebratum; vices optineat supradictas. et sic deinceps retrocedendo. donec in aliqua provinciarum isto modo valeat vicarius inveniri. Et hec habet duo capitula.

Item hanc. In capitulo de solempni celebratione capituli. addatur in principio sic. capitulum generale quantum ad auctoritatem diffinitorum in vigilia pentecostes incipit celebrari. et illud quod in eodem capitulo dicitur circa finem. capitulum vero. etc. usque ibi. capitulum autem. etc. deleatur. Et hec habet · ii · capitula.

Item hanc. In capitulo de studentibus. ubi dicitur. · iiiior · autem provincie. etc. deleatur · iiiior · et dicatur sic. · vi · autem provincie. scilicet. Hispania. Provincia. Lombardia. Romana provincia. Theotonia. Anglia; provideant. etc. Et hec habet · ii · capitula.

Item hanc. In ordinario in rubrica officii diei parasceves. ubi dicitur. discalciati. et infra in eodem. calcient se. deleatur. Et hec habet · ii · capitula. Iste sunt inchoaciones.

Inchoamus has. In capitulo de electione prioris provincialis. in fine addatur sic. statuimus autem quod in singulis provinciis priores provinciales vel eorum vicarii et diffinitores capituli provincialis. provincias suas per vicarias distinguant. secundum quod eis videbitur expedire. quibus singulos vicarios preficiant. qui non sint priores neque lectores actu legentes. nisi prius a suis officiis absolvantur. requisito consilio fratrum presencium ad dictas vicarias pertinencium. qui sunt de corpore capituli provincialis. Qui vicarii in domibus sibi assignatis. prioris provincialis plenarie gerant vices. excepta dumtaxat institutione et destitucione priorum et lectorum. et ubique teneant loca sua nisi in capitulo. dum officium sue vicarie exercent. quorum potestas die immediate precedente electionem diffinitorum capituli provincialis expiret. hos autem vicarios priores provinciales possunt corrigere. vel ex causa rationabili amovere.

Item hanc. In eodem capitulo. ubi dicitur. mortuo priore provinciali vel amoto. etc. deleatur totum quod sequitur. usque ibi. statuimus ut prior provincialis. etc. et dicatur sic. mortuo priore provinciali vel amoto. ad provinciale capitulum prioris provincialis electio vel postulacio pertinebit. et in die immediate precedente diem assignatam ad sequens provinciale capitulum celebrandum; prior provincialis secundum formam canonicam eligatur. vel eciam postuletur. receptis votis a tribus de electoribus. qui primitus habitum nostri ordinis susceperunt. nisi per communem inspirationem vel per compromissum sibi voluerint providere. quod si tunc sibi de provinciali non providerint; potestas providendi ad magistrum ordinis transferatur.

Item hanc. In capitulo de capitulo provinciali. post illud ubi dicitur. eius excessum referant ad capitulum generale. scripto communiter sigillato. addatur sic. singulis annis in capitulo provinciali auditis culpis. fiat

secretum scrutinium in conspectu omnium. super retencione vel absolutione prioris provincialis. cum expressione nominum. et officiorum fratrum exprimentium vota sua. per tres fratres de corpore capituli. qui primitus habitum nostri ordinis susceperunt. quod scrutinium non publicetur. vel aliter ostendatur. sed statim sigillis diffinitorum in conspectu omnium sigilletur. et per diffinitorem generalis capituli. vel eius socium. vel per socium prior provincialis. in anno provincialium. ad generale capitulum deportetur. Et hec eadem forma scrutini facienda de priore conventuali. in tractatu eorum que mittenda sunt ad capitulum provinciale observetur. et sigillo conventus ipsum scrutinium sigilletur. Dictis autem scrutatoribus voluntatum. in virtute obediencie prohibemus. ne dictum scrutinium alicui per modum aliquem revelare presumant.

Item hanc. In eodem capitulo. post illud ubi dicitur. sine causa legitima. addatur sic. si vero socium prioris conventualis euntis ad provinciale capitulum contigerit impediri. antequam iter arripiat ad eundem; conventus alium possit eligere loco eius.

Item hanc. In capitulo de electione prioris conventualis. ubi dicitur. domus suppriorie caruerit et vicario. deleatur. et dicatur sic. domus suppriorie presentem non habuerit vel vicarium prioris.

Item hanc. In capitulo de recipiendis. ubi dicitur. nullus recipiatur in fratrem clericum. addatur. ad probationem vel ad professionem.

Item hanc. In capitulo de electione prioris provincialis. post illud ubi dicitur. si autem vicarium. etc. usque ibi. donec prior eiusdem provincie. etc. deleatur totum et dicatur sic. quod si capitulum provinciale ex aliqua causa ad conventum alium transferatur. post translacionem. prioris vicarii potestas expiret. et prior loci illius. ad quem capitulum est translatum; vices provincialis optineat. Si autem conventus ille. ubi capitulum assignatum fuerat. vel translatum. priorem non habuerit. vel eum infra tempus vicarie sue mori contigerit. vel eciam amoveri. prior illius domus. ubi provinciale capitulum antecedens fuerat celebratum; vices provincialis in omnibus optineat. et sic deinceps retrocedendo. quousque conventus. in quo capitulum provinciale fuerit celebrandum. priorem habuerit. qui vices provincialis in omnibus optinebit.

Item hanc. In capitulo de gravissima culpa. ubi dicitur. preceptum est patris nostri Augustini etc. deleatur totum usque ad finem capituli. et dicatur sic. hic carcerali custodie mancipetur. et ibidem secundum exigenciam culparum iuxta discrecionem prelati disciplinis et abstinenciis puniatur. Idem dicimus de omnibus illis. qui iudicio discretorum in communi. sine gravi periculo vel scandalo tolerari non possunt.

Iste sunt admoniciones.

Admonemus. quod priores provinciales vel eorum vicarii. non mittant ad studia fratres discolos. vel ineptos. et si quos tales miserint; sine dilacione studeant revocare.

Item. Quod constitucio de non equitando et de non comedendis carnibus; diligentius observetur. et qui culpabiles inventi fuerint; per priores provinciales et visitatores gravius puniantur.

Item. Quod priores conventuales constitucionem de silencio tenendo. et de penitencia pro fractione silentii. et de ieiuniis ordinis diligentius faciant observari.

Item. Quod fratres discoli et indisciplinati ad conventus novos et parvos non mittantur. et missi per priores provinciales revocentur. et ponantur in locis. in quibus melius poterunt sub disciplina teneri.

Item. Priores provinciales. quando assignant fratres periculosos conventibus qui ignorant condiciones illorum; statum ipsorum prioribus illorum conventuum studeant intimare.

Item. Nullus prior conventualis apostatam alterius conventus recipiat ad ordinem sine prioris provincialis. vel eius vicarii licencia speciali.

Item. Quod constitucio de recepcione fratrum conversorum. secundum quod scripta est. observetur. et ipsi a suis prioribus in officiis occupentur.

Item. Ordinamus et iniungimus. quod in quolibet capitulo provinciali fiat secretum scrutinium de retencione vel absolutione prioris provincialis et sub sigillis diffinitorum. expressis fratrum nominibus. mittatur ad capitulum generale. Idem eciam fiat de prioribus conventualibus in conventibus suis. et scrutinium sub sigillo conventus mittatur ad capitulum provinciale.

Item. Volumus et mandamus. quod studentes pecuniam sibi a provinciali vel a conventibus assignatam. non expendant nisi in libris theologicis; nisi de prioris provincialis licencia speciali. Cum autem de studio redierint. de receptis et expensis prioris provinciali et conventuali teneantur reddere rationem; secundum quod ab ipsis pecuniam receperunt.

Item. Volumus et mandamus. quod nullus frater habeat vestes ecclesiasticas vel ornamenta seu aliqua paramenta. nec cruces aureas vel argenteas. vel cum lapidibus preciosis. nec annulos. vel lapides preciosos. qui autem habuerint expedire se infra tres menses a tempore noticie teneantur. quod si non fecerint; illis conventibus de quibus fratres fuerint assignamus.

Item. Magister ordinis. de voluntate et consilio diffinitorum precipit districte. in virtute obediencie. fratribus universis. quod in alchimia non studeant. nec doceant. nec aliquatenus operentur. nec aliqua scripta de sciencia illa teneant. sed prioribus suis restituant quam cito poterunt. bona fide per eosdem priores prioribus provincialibus assignanda.

Item. Volumus et mandamus. quod priores provinciales et diffinitores capitulorum provincialium. nullum locum recipiant. nisi eis prius constiterit. quod sit locus ydoneus pro conventu edificando. per fratres ydoneos ad hoc inquirendum specialiter destinatos.

Ordinacionem studii Parisiensis. et aliorum generalium studiorum quoad principales lectores et baccalarios; committimus magistro ordinis.

Item. Tam priores quam eorum vicarii. diffinitores generalis capituli transeuntes et redeuntes per eorum conventus deducant vel deduci faciant ad proximos conventus; necessaria procurando.

Concedimus provincie Ispanie; · ii · domos. quarum una ponatur in Sede Urgellensi.

Provincie Provincie; · i ·

Provincie Francie · i · ponendam in Poloniaco.

Provincie Theotonie; · ii ·

Provincie Anglie; · i · et omnes ponantur. ubi prioribus provincialibus et diffinitoribus capitulorum provincialium videbitur expedire.

Ista sunt suffragia.

Pro domino papa et statu universalis ecclesie quilibet sacerdos · iii · missas etc.

Suffragia prodefunctis.

Pro domino Anibaldo cardinali defuncto; quilibet sacerdos · i · missam<sup>1</sup>. Pro fratre Romano defuncto; quilibet sacerdos · i · missam<sup>2</sup>. Pro diffinitore Grecie defuncto; quilibet sacerdos · iii · missas. etc.

Pro qualibet missa superius posita; clerici · vii · psalmos cum litania. et conversi · c · pater noster. cum totidem ave Maria dicant.

Absolvimus priores provinciales; Hyspanie. Polonie.

Conventuales Sairensem (!) et iniungimus ei · x · dies in pane et aqua · x · missas et · x · disciplinas. Novensem. et iniungimus ei · xv · dies in pane et aqua · v · psalteria et · xv · disciplinas. et totidem letanias. et quod non possint hoc anno eligi in priores. Alii autem priores non possint hoc anno assumi ad eadem officia. provinciales in eisdem provinciis et conventuales in eisdem conventibus.

Sentencias iudicum approbamus.

Sequens capitulum generale in conventu Burdegalensi in provincia Provincie assignamus vel in loco. ubi secundum exigenciam consilii; magister duxerit eligendum.

Diffinitores ita veniant tempestive. quod sint in loco capituli dominica proxima ante pentecosten.

Actis additae sunt litterae magistri ordinis; cf. app. n. XXIV.